

宋史

冊表

宋史卷四百八十三

元中書右丞相總裁脫脫等修

列傳第二百四十二

世家六

湖南周氏

荆南高氏

漳泉留氏

陳氏

湖南周行逢朗州武陵人少無賴不事產業嘗犯法配隸鎮兵以驍勇累遷裨校自唐乾寧二年馬氏專有湖南二十州之地雖稟朝廷正朔其郡守官屬皆自署至周廣順初兄弟爭國求援於江南李景景遣大將邊鎬率兵赴之因下長沙遷馬氏之族於建康封希萼爲楚王居洪州希崇鎮舒居揚州宋興希崇率兄弟十七人歸朝皆爲美官景以鎬爲潭帥會朗州衆亂推衙將劉言爲留後言以行逢爲都指揮使行逢以衆情表於景請授言節鉞景不從召言入金陵言懼遣副使王進逵行軍何景真與行逢帥舟師襲破潭州鎬遁去行逢等

據其城言遣使上言長沙兵亂焚燒公府請移治朗州周祖卽以言爲朗帥王進逵爲潭帥行逢爲潭州行軍司馬領集州刺史未幾進逵寇朗州害劉言周祖卽以進逵爲朗州節度以行逢領鄂州節度知潭州軍府事初朗州人謂劉言爲劉蛟牙馬氏將亂湘中童謠云馬去不用鞭蛟牙過今年及邊鎬俘馬氏鎬爲劉言所逐而言亦被害顯德中世宗將用師淮南詔朗州王進逵出師入鄂州界進逵遣裨將潘叔嗣領兵五千爲先鋒行及鄂州界叔嗣乃回戈襲進逵進逵聞之倍道先入武陵叔嗣攻其城進逵敗走爲叔嗣所殺迎行逢爲節度行逢至卽斬叔嗣以徇世宗乃授行逢朗州大都督武平軍節度制置武安靜江等州軍事兼侍中盡有湖南之地宋初加兼中書令行逢在鎮盡心爲治辟署官屬必取廉介之士有女壻求補吏不許返給以耒耜語之曰吏所以治民也汝才不能任職豈敢私汝以祿邪姑歸墾田以自活其公正多此類條教簡約民皆悅之然性多猜忌左右少有忤意者必寘於法麾下之人重足累息有何景山者爲王進逵記室常狎侮行逢及行逢爲帥署景山益陽令數月縛

投於江又館驛巡官鄧洵美與翰林學士李昉同年進士會昉使行逢召至傳舍與話終日行逢疑其泄己陰事黜爲易俗場官潛遣殺之由是士流不附馬氏舊僚有天策府學士徐仲雅性滑稽頗恃才倨傲行逢以爲節度判官行逢多署溪洞蠻酋爲司空太保一日謂仲雅曰吾奄有湖湘兵彊俗阜四鄰其懼我乎仲雅曰公部內司空滿川太保徧地孰敢不懼行逢不悅擯斥仲雅行逢妻潘氏貌醜性剛狠行逢爲帥妻不爲屈不入府署躬率奴僕耕織以自給賦調必先期輸送行逢止之不從曰稅官物也若主帥自免其家何以率下建隆三年十月行逢卒追封汝南郡王子保權年十一初爲武平軍節度副使太祖授以起復檢校太尉朗州大都督武平軍節度初行逢疾且亟召將校託保權曰吾部內兇狠者誅之略盡唯張文表在焉吾死文表必亂諸公善佐吾兒無失土宇必不得已當舉族歸朝無令陷於虎口行逢卒明年春文表果自衡州舉兵據潭州將取朗陵盡滅周氏保權乞師於朝廷江陵高繼沖亦以其事聞上遣中使趙璘齎詔諭文表而保權之奏繼至乃遣山南東道節度慕容延釗

爲湖南道行營都部署宣徽南院使李處耘爲都監率淄州刺史尹崇珂申州刺史聶章鄆州刺史趙重進判四方館事武懷節氈毯使張繼勳染院副使康延澤內酒坊副使盧懷忠等將步騎往平之又發安復等十州兵會于襄陽師及江陵趙璲至潭州文表已爲保權之衆所殺保權牙校張從富輩以爲文表已平而王師繼進不已懼爲襲取相與拒守延釗令閤門使丁德裕先路安撫及至城下從富輩拒而不納盡撤部內橋梁沉舫伐樹塞路德裕以不奉詔不敢與戰退軍以須朝旨延釗以聞太祖遣中使諭保權及將校曰爾本請師救援故發大軍以拯爾難今妖孽旣殄是有大造於爾輩反拒王師何也無自取塗炭重擾生聚保權出軍於澧州南未及交鋒望風而潰復還朗州焚廬舍庫皆盡驅略居人奔竄山谷城郭爲之一空王師長驅而南獲從富於西山下梟首朝市其大將汪端劫保權衆寇略未幾亦就擒磔於市湖湘悉平保權至上懷節分兵克岳州端擁保權衆寇略未幾亦就擒磔於市湖湘悉平保權至上章待罪優詔釋之賜襲衣金帶鞍勒馬茵褥銀器千兩帛二千匹錢千貫授右

千牛衛上將軍葺京城舊邸院爲第令居焉仍下詔朗州增築行逢之墓保權
乾德五年累遷右羽林統軍太平興國元年知并州賜錢三百萬雍熙二年卒
年三十四

李觀象桂州臨桂人行逢署爲掌書記行逢性殘忍多誅殺觀象懼及禍清苦
自勵以求知遇帳幃寢衣悉以紙爲之行逢頗加信任軍府之政一皆取決觀
象涉經史有文辭忌才怙寵湖南士人多爲所排擯行逢臨終託以後事令其
子保權善待之及張文表難作王師壓境觀象謂保權曰我所恃者北有荆渚
以爲唇齒今高氏拱手聽命朗州勢不獨全莫若幅巾歸朝則不失富貴保權
幼懦不能用其言及湖湘平太祖聞觀象嘗爲保權畫謀以爲左補闕

張文表朗州武陵人從王進逵周行逢舉兵逐邊鎬行逢署文表衡州刺史頗
心忌之常欲誅文表未有以發及行逢卒保權遣兵代永州戍卒路出衡陽文
表遂驅之以襲潭州時行軍司馬廖簡知留後素輕文表不爲之備方宴飲外
報文表兵至簡殊不以介意謂四坐曰此黃口小兒至則成擒何足患也飲啖

如故俄文表率衆徑入府中簡醉不能穀弓弩但按膝叱之文表遂害簡及坐客十餘人保權遣其將楊師璠悉衆以禦文表保權泣謂衆曰先君可謂知人矣今墳土未乾文表構逆軍府安危在此一舉諸公勉之衆皆感憤遂破其衆於平津亭擒文表鬱而食之初文表將攻長沙猶豫未決有小校夢文表龍出領下明日以告文表喜曰天命也及敗梟首于朗陵市

荆南高保融字德長其先陝州峽石人祖季興唐末爲荆南節度歷梁後唐封南平王卒子從誨嗣至太傅中書令五代史有傳從誨生保融以長興初蔭補太子舍人賜緋晉天福中制授檢校司空判內外諸軍俄遷節度副使開運末領峽州刺史累加至檢校太傅漢初從誨卒權知軍府事制授起復檢校太尉同平章事江陵尹荆南節度荆歸峽觀察使遣翰林使郭允明賜衣幣乾祐二年加檢校太師兼侍中周廣順初加兼中書令封勃海郡王正衡命使禮部尙書王易副使刑部郎中景範發冊命仍賜禮服冠劍顯德初進封南平王世宗卽位加守中書令世宗征淮南詔保融出水軍數千人抵夏口爲犄角淮甸平

璽書褒美以絹數萬匹賞其軍世宗將議伐蜀保融上言請率舟師趣三峽六年恭帝卽位加守太保宋初守太傅連遣使貢獻恩顧甚厚是歲八月卒年四十一廢朝三日遣儀鸞使李繼超賜賻物兵部尙書李濤兵部郎中率汀持節冊贈太尉諡正懿保融性迂闊淹緩御兵治民一時術略政事悉委於母弟保勛焉子繼冲繼充繼充至歸州刺史

保勛字省躬從誨第十子保融同母弟也晉天福初起家領漢州刺史保融嗣政令判內外諸軍事周廣順元年加檢校太傅充荆南節度副使顯德初從保融之請加檢校太尉充行軍司馬領寧江軍節度融卒保勛權知軍府奉章以聞太祖卽授以節度使建隆二年遣其弟保寅入貢初保融於紀南城北決江水瀦之七里餘謂之北海以閱行者至是太祖因保寅歸諭旨令決去使道路無阻保勛幼多病體貌臃瘠淫佚無度日召娼妓集府署擇士卒壯健者令恣調謔保勛與姬妾垂簾共觀以爲娛樂又好營造臺榭窮極土木之工軍民咸怨政事不治從事孫光憲切諫不聽三年十一月卒年三十九廢朝二日贈侍

中遣御廚使李光睿賻祭初保勛在保抱從誨獨鍾愛故或盛怒見之必釋然而笑荆人目爲萬事休及保勛之立藩政離弱卒裁數月遂失國亦預兆也

繼沖字贊平保融長子也周顯德六年以蔭檢校司空爲荆南節度副使建隆三年保勛寢疾以繼沖爲節度副使權知軍府保勛卒四年正月制授繼沖爲檢校太保江陵尹荆南節度時湖南張文表叛周保權求救於朝廷詔江陵發水軍三千人赴潭州繼沖卽遣親校李景威將之而往二月慕容延釗李處耘等率衆至繼沖以牛酒犒師開門納延釗等卽遣客將王昭濟蕭仁楷奉表納土太祖令御廚使郃岳持詔安撫樞密承旨王仁贍爲荆南都巡檢使仍令齎衣服玉帶器幣鞍勒馬以賜繼沖授繼沖馬步都指揮使梁延嗣爲復州防禦使節度判官孫光憲爲黃州刺史右都押衙孫仲文爲武勝軍節度副使知進奏鄭景攷爲右驍衛將軍王昭濟左領軍衛將軍蕭仁楷供奉官繼沖籍管內芻糧錢帛之數來上又獻錢五萬貫絹五千匹布五萬匹復遣支使王崇範詣闕貢金器五百兩銀器五千兩錦綺二百段龍腦香十斤錦繡帷幕二百事三

月詔鞍轡庫使翟光裔齎官告旌節賜繼冲并存問參佐官吏等又以保融兄弟諸父江陵少尹保紳爲衛尉卿節院使保寅爲將作監充內作坊使左衛都將保緒爲鴻臚少卿右衛都將保節爲司農少卿合州刺史從翊爲右衛將軍衙將保遜爲左監門衛將軍巴州刺史保衡爲歸州刺史知峽州事保膺爲本州刺史衙將從詵爲右衛率府率從讓爲左清道率府率從謙爲左司禦率府率又以王崇範爲節度判官高若拙觀察判官梁守彬江陵少尹韋仲宣掌書記胡允脩節度推官州縣官悉仍舊別賜管內符印五月保紳等來朝各賜京城第一區六月命王仁瞻兼知軍府事會是歲將郊祀表求入覲可之十月至闕下獻金銀器錦帛寶裝弓劍繡旗幟象牙玉鞍勒等賜賚甚厚郊裡畢授繼冲徐州大都督府長史武寧軍節度使徐宿觀察使繼冲鎮彭門幾十年委政僚佐部內亦治開寶六年卒年三十一廢朝二日贈侍中遣中使護喪葬事官給自高季興據有荆南歸峽之地傳襲三世五帥凡四十餘年

保寅字齊巽晉天福七年以蔭授太子舍人賜緋累加檢校司空兄保融襲封

奏署節院使賜金紫宋興保勛既襲封遣保寅入覲太祖召對便殿授掌書記
遣還保寅語保勛曰真主出世天將混一區宇兄宜首率諸國奉土歸朝無爲
他人取富貴資保勛不聽王師討武陵道出荆渚保寅奉牛酒迎犒軍鋒太祖
嘉之驛召赴闕授將作監充內作坊使賜第一區俄知宿州乾德四年丁外艱
起復轉少府監開寶五年知懷州歷司農衛尉二卿是州本隸河陽時趙普爲
帥與保寅素有隙事多抑制保寅心不能平手疏請罷支郡之制詔從之又爲
西川諸州都巡檢使改光祿卿歷知同汝二州改光化軍卒年六十八廢朝賻
錢十萬初保寅在懷州蘇易簡王欽若並妙年始趨學在同州錢若水爲從事
在光化軍張士遜其邑人也保寅一見皆獎拔許以遠大議者多其知人子輔
政輔之輔亮輔國並進士及第輔政至祕書丞輔之至太常丞

孫光憲字孟文陵州貴平人世業農畝惟光憲少好學游荆渚高從誨見而重
之署爲從事歷保融及繼沖三世皆在幕府累官至檢校祕書監兼御史大夫
賜金紫慕容延釗等救朗州之亂假道荆南繼沖開門納延釗光憲乃勸繼沖

獻三州之地太祖聞之甚悅授光憲黃州刺史賜賚加等在郡亦有治聲乾德六年卒時宰相有薦光憲爲學士者未及召會卒光憲博通經史尤勤學聚書數千卷或自抄寫孜孜讎校老而不廢好著撰自號葆光子所著荆臺集三十卷鞏湖編玩三卷筆傭集三卷橘齋集二卷北夢瑣言三十卷蠶書二卷又撰續通歷紀事頗失實太平興國初詔毀之子謂讜並進士及第

梁延嗣京兆長安人少事高季興頗見委任表授檢校司空領綿州刺史充衙內馬步軍都指揮使歷事四帥人稱其忠蓋繼沖之納土也延嗣亦嘗勸之復率荆之水軍從慕容延釗越戰太祖嘉之授復州防禦使充湖南前軍步軍都指揮使兼排陣使後因郊禮自復州入朝太祖慰撫之曰使高氏不失富貴爾之力也改濠州防禦使有善政詔書褒美延嗣頗知書好接士嘗暴疾禳於城隍神是夕夢神人告以九九之數俄疾愈開寶九年卒八十一

漳泉留從效泉州永春人幼孤事母兄以孝悌聞頗知書好兵法唐末王審知據有福建之地子延鈞後唐長興中僭稱帝國號閩都福州爲其下所殺立審

知次子延義晉天福末部將朱文進殺延義據其位署其黨黃紹頗爲泉州刺史程贇爲漳州刺史許文禎爲汀州刺史時審知子延政爲建州刺史亦僭稱帝泉人念王氏失國羣逆分據時從效爲泉州散指揮使與其黨王忠順董思安及所親蘇光誨相與圖議興復王氏從效倡言吾等皆受王氏恩遇今王氏子孫未復位而不思報可謂忠義乎聞建州士卒謀盡力擊福州以復王氏苟一旦功先成王氏復位我輩何面見之邪於是忠順思安置酒從效家募敢死士得陳洪進等五十二人夜持白梃踰城而入劫庫兵擒紹頗斬之立延政從子繼勳爲刺史從效等三人自署爲統帥洪進等皆爲指揮使繼勳令送紹頗首於建州奉延政爲主延政遂送款於江南李景文進率衆攻泉州爲從效所敗會景遣將討王氏之亂圍福州兩浙錢氏發兵來援景將但克汀建而歸福州入於錢氏從效以兵劫繼勳送江南自領漳泉二州留後李景卽建泉州爲清源軍授從效節度泉漳等州觀察使閩中五州自此分矣景累授從效同平章事兼侍中中書令封鄂國公晉江王從效出自寒微知人疾苦在郡專以勤

儉養民爲務常衣布素置公服於中門之側出則衣之每言我素貧賤不可忘
本民甚愛之部內安治王氏有二女嫁爲郡人妻從效奉之甚謹資給豐厚每
歲取進士明經謂之秋堂世宗征淮南李景以兵十萬保紫金山從效累表於
景言其頓兵老師形勢非便旣而果敗江北之地盡入於中朝從效遣衙將蔡
仲贇等爲商人以帛書表置革帶中自鄂路送款內附又遣別駕黃禹錫間道
奉表以獬豸通犀帶龍腦香數十斤爲貢世宗錫詔書嘉納之從效又乞置邸
京師世宗以其素附江南慮其非便不許宋初從效遂上表稱藩貢奉不絕會
李景遷洪州從效疑景討己頗懼遣其從子紹鎡齎厚幣獻景又遣使假道吳
越入貢太祖特命使厚賜以撫之使未至從效疽發背卒年五十七僞贈太尉
靈州大都督從效無嗣以兄從願之子紹鎡紹鎡爲子從效寢疾時從願守漳
州紹鎡在金陵紹鎡尙幼衙校張漢思陳洪進等率兵劫從效遷東亭漢思自
稱留後洪進爲副使時建隆三年也明年洪進又廢漢思而自立從效再從弟
仁諲淳化中爲泗州長史有清節官散奉薄雖藜藿不充未嘗妄干人太宗聞

之詔赴闕特遷揚州觀察支使大中祥符七年從效孫丕式詣闕上從效所受太祖朝制書授三班借職

陳洪進泉州仙遊人幼有壯節頗讀書習兵法及長以材勇聞隸兵籍從攻汀州先登補副兵馬使從留從效殺黃紹頗將以紹頗首送建州請出兵爲援羣下以道阻賊威憚其行洪進慮事久生變獨請往至尤溪賊數千人遮道不得前洪進給賊曰福州泉州已爲義師所襲爾輩復爲何人戍守卽持紹頗首示之曰我送此於建州迎嗣君以歸國爾輩將安歸乎賊遂潰渠帥數人皆聽命洪進至建州延政大悅以爲本州馬步行軍都校是歲晉開運元年也自是漳州殺程贇迎延政從子繼成爲刺史許文稹以汀州降連重遇殺朱文進傳首建州福人又殺重遇延政遂遣洪進歸泉州三年李景陷建州延政入江南明年泉州留從效劫王繼勳降江南景以從效爲清源軍節度洪進爲統軍使與副使張漢思同領兵柄累立戰功從效卒少子紹鉉典留務月餘洪進誣紹鉉將召越人以叛執送江南推副使張漢思爲留後自爲副使漢思年老醇謹不

能治軍務事皆決於洪進漢思諸子並爲衙將頗不平洪進圖欲害之漢思亦患其專明年夏四月漢思大享將吏伏甲於內將害洪進酒數行地忽大震棟宇將傾坐立者不自持同謀者以告洪進洪進亟去衆驚悸而散漢思事不成慮洪進先發常嚴兵爲備洪進子文顯文顯皆爲指揮使勒所部欲擊漢思洪進不許一日洪進袖置大鎖從二子常服安步入府中直兵數百人皆叱去之漢思方處內齋洪進卽鎖其門使人叩門謂漢思曰郡中軍吏請洪進知留務衆情不可違當以印見授漢思惶懼不知所爲卽自門間出印與之洪進遽召將校吏士告之曰漢思昏耄不能爲政授吾印請吾蒞郡事將吏皆賀卽日遷漢思別墅以兵衛送遣使請命於李煜煜以洪進爲清源軍節度泉南等州觀察使時太祖平澤潞下揚州取荆湖威振四海洪進大懼遣衙將魏仁濟間道奉表自補清源軍節度副使權知泉南等州軍府事且言張漢思老耄不能御衆請臣領州事恭聽朝旨太祖遣通事舍人王班賚詔撫諭又與李煜詔曰泉州陳洪進遣使奉表言爲衆所推因而總領州事以誠控告聽命於朝觀其傾

輸尤足嘉尙但聞泉州昔嘗附麗尤荷撫綏然變詐多端屢移主帥恐其地里遼遠制御有所未遑朕以書軌大同恩威遠被嘉其款附已降詔書蓋矜其遠俗便安不必以彼此爲意想惟明哲當體朕懷煜上言洪進多詐首鼠兩端誠不足聽太祖又詔諭之煜乃聽命建隆四年遣使朝貢是冬又貢白金萬兩乳香茶藥萬斤煜復上言請寢洪進恩命太祖又以諭煜乾德二年制改清源軍爲平海軍授洪進節度泉漳等州觀察使檢校太傅賜號推誠順化功臣鑄印賜之以文顯爲節度副使文顯爲漳州刺史是年夏丁家艱起復洪進每歲以修貢朝廷多厚歛於民第民貲百萬以上者令差入錢以爲試協律奉禮郎蠲其丁役及江南平吳越王來朝洪進不自安遣其子文顯入貢乳香萬斤象牙三千斤龍腦香五斤太祖因下詔召之遂入覲至南劍州聞太祖崩歸鎮發哀太宗卽位加檢校太師明年四月來朝朝廷遣翰林使程德玄至宿州迎勞旣至賜錢千萬白金萬兩絹萬匹禮遇優渥又增其食邑以其子文顯爲團練使文顯文瑒並爲刺史洪進遂上言曰臣聞峻極者山也在汙壤而不辭無私者